



Tužilaštvo/Tužiteljstvo Brčko distrikta Bosne i Hercegovine
Тужилаштво Брчко дистрикта Босне и Херцеговине
Prosecutor's Office of the Brcko District of Bosnia and Herzegovina

<http://jt-brckodistriktbih.pravosudje.ba>



Trg pravde 10, 76100 Brčko distrikt Bosne i Hercegovine; web: jt-brckodistriktbih.pravosudje.ba; tel: 049/217-227; faks: 049/219-088; e-pošta: jtbd@jtbd.ba
Трг правде 10, 76100 Брчко дистрикт Босне и Херцеговине; web: jt-brckodistriktbih.pravosudje.ba; тел: 049/217-227; факс: 049/219-088; е-пошта: jtbd@jtbd.ba

Broj: T18 0 KTRZ 00 11999 18
Brčko, 24. januar 2018.godine

Sukladno odredbi člana 35. stav (2) tačka i) i člana 226. stav (1) Zakona o krivičnom postupku Brčko distrikt BiH, podižem:

OPTUŽNICU

Protiv:

VIDA-LUJIĆ NIKOLE ... rođen ... 1971. godine u Brčkom ...

Što je:

Za vrijeme rata i oružanog sukoba u Bosni i Hercegovini između vojnih i policijskih snaga RBiH sa vojnim i policijskim snagama Republike Srpske i paravojnim formacijama, kršeći pravila međunarodnog humanitarnog prava za vrijeme oružanog sukoba, postupajući suprotno odredbi člana 3. Ženevske konvencije o zaštiti civilnih lica za vrijeme rata od 12. augusta 1949. godine, kao pripadnik paravojne formacije "Crvene beretke",

Dana 20. juna 1992. godine, u tadašnjoj ulici ... broj 48 u Brčkom, zajedno sa još dva nepoznata uniformisana vojnika, odjeven u maskirnu vojnu uniformu i naoružan pištoljem, došao u porodičnu kuću A.Š., te pred istom izvadio pištolj i napunio ga mecima i vratio nazad u svoj džep, a što je kod Š. izazvalo osjećaj straha za vlastiti život, te zatim Š. naredio da mu preda zlato i novac koji ima, pa kada je to isto učinila, u namjeri da nad tijelom A.Š. izvrši nasilnu penetraciju, iskoristivši tom prilikom okruženje prisile, sa pištoljem pri sebi prišao joj, uzeo je za ruku i naredbodavno rekao: "Hajde sa mnom", odveo je u kupatilo i zaključao vrata, a potom je uhvatio za glavu, oborio u klečeći položaj, te svojim polnim organom izvršio oralnu obljubu, nakon kojeg čina joj je skinuo donji dio trenerke, te svojim polnim organom izvršio i vaginalnu obljubu, znajući da je pri tom činu Š. imala osjećaj izgubljenosti i bila u stanju šoka, pa kada se je ista okrenula i sagnula prema lavabou da se umije, svojim polnim organom pokušao prodrijeti u njen analni otvor, a nakon vriske A.Š. da to ne čini prestao je, istu izveo iz kupatila, a potom je odveo u spavaću sobu, pri tom cijelo vrijeme držeći pištolj u ruci, legao na krevet, te oštećenju Š. naredio da skine donji dio trenerke i legne na njega, nakon čega je ponovno svojim polnim organom izvršio vaginalnu obljubu, a pri tom činu mu je A.Š. tražila da je ubije, na što je Nikola odgovorio da on nije zadužen za to, dok su za to vrijeme ostala dva vojnika izvršila premetačinu i polupali stvari po kući, da bi nakon izvršenog silovanja nad Š. sa nepoznatim vojnicima napustio kuću i udaljio se u nepoznatom pravcu, a kojom prilikom je A.Š. pretrpila tešku duševnu bol, koja je za posljedicu dovela do posttraumatskog stresnog poremećaja hroničnog toka (PTSP) i dugogodišnjeg liječenja,

dakle, kršeći pravila međunarodnog prava za vrijeme oružanog sukoba prisilio drugu osobu upotrebom sile i prijetnje direktnim napadom na njezin život i tijelo, na seksualni odnos i s njim izjednačenu seksualnu radnju,

čime je počinio krivično djelo – Ratni zločin protiv civilnog stanovništva – iz člana 142. stav (1) Krivičnog zakona Socijalističke Federativne Republike Jugoslavije;

Preduzimanje radnji krivičnog gonjenja prema određenoj osobi ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica
